

Angajoqqaarsiat atugaasa pitsannorsaavigineqarnissaat aningaasatigullu paaqqinninnerminni tigusartagaasa qaffaavigineqarnissaat, taamatutaaq nerisaqarnermut-, atisarsiutissat-, kiisalu kaasarfimmiorisartakkanut aningaasartuutaasartut ullutsinnut naapertuuttunngorlugit naleqqussarneqarnissaannik Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortamit, Laura Táunâjik-mit, Siumut, saqqummiunneqartoq)

pillugu

Ilaqutariinnermut Peqqissutsimullu Ataatsimiititaliap

siunnersuutip aappassaaneerpeqarneranut

ISUMALIUTISSIISUTAA

Ataatsimiititaliap suliarinninnermini kingullermik ilaasortarai:

Inatsisartunut ilaasortaq Martha Lund Olsen, Siumut, siulittaasoq
Inatsisartunut ilaasortaq Mala Høy Kuko, Atassut, siulittaasup tullia
Inatsisartunut ilaasortaq Jess Svane, Siumut
Inatsisartunut ilaasortaq Laura Táunâjik, Siumut
Inatsisartunut ilaasortaq Debora Kleist, Inuit Ataqtigiit
Inatsisartunut ilaasortaq Mimi Karlsen, Inuit Ataqtigiit
Inatsisartunut ilaasortaq Kelly Berthelsen, Inuit Ataqtigiit

UPA 2017-ip nalaanni ulloq 4. maj 2017-imi siullermeerinninnerup kingorna ataatsimiititaliap siunnersuut misissorpaa.

1. Siunnersuutip imarisaa siunertaalu

Siunnersuut angajoqqaarsiat nalinginnaasumik akissarsiaasa taamatutaaq nerisaqarnermut, atisarsiutissat aamma qitornarsianut kaasarfimmioritittakkat iluarsivigineqarnissaannut Naalakkersuisut peqquneqarnissaat pillugu aalajangiiffigisassatut siunnersuutaavoq. Siunnersuut ilaqutariinnut angajoqqaarsiannngornissamut kajumissuseqarnerulersikkumallugit angajoqqaarsiaasartut aningaasaqarniarnermikkut atugaasa pitsannorsarneqarnissaannik siunertaqarpoq.

2. Siunnersuutip Inatsisartunit siullermeerneqarnera

Siunnersuummik siullermeerinermi siunnersuummik aappassaaneerinissap 2017-imi ukiakkut ataatsimiinnissamat kinguartinneqarnissaa pillugu Naalakkersuisut innersuussutigisaat Siumumit, Inuit Ataqtigiinnit aamma Demokraatinit tapersersorneqarpoq. Partiinit tamanit aamma Partii Naleqqamit Atassumillu siunnersuut tungaviumik tapersersorneqarpoq.

Tamanna tungavigalugu siunnersuut sukumiinerusumik suliarineqartussanngorlugu Ilaqutariinnermut Peqqissutsimullu Ataatsimiititaliamut innersuunneqarpoq.

3. Ataatsimiititaliap siunnersuummik suliarinninnera

Siunnersuummik aappassaaneerinissaq UKA 2017-imut kinguartinneqarnissaa aallarniutigalugu ataatsimiititaliamit qinnutigineqarsimagaluarpoq, taamaattorli piaartumik isumaliutissiisumut aappassaaneerinissaq aalajangiullugu, taamaalilluni naalakkersuinikkut oqariartuutigineqartut eqqarsaatigineqarsinnaaqullugit.

Angajoqqaarsianut periusissiamik tamatumunnga atatillugu angajoqqaarsiat ataatsimut akilerneqartarnerisa nalilersorneqarnissaanik suliamik Naalakkersuisut aallartitsiniarmata naammagisimaarlugu ataatsimiititaliamit tusaatissatut tiguneqarpoq.

Angajoqqaarsiatut akissarsiat, nerisaqarnermut, atisassarsiuutissatut kaasarfimmiunullu akissaatit ukiorpassuarni iluarsiivigineqarneq ajornerisigut naleerukkiartulersimasut siunnersuuteqartup Naalakkersuisullu tikkuarpaat.

Angajoqqaarsianut nalinginnaasumik akissarsiaritittakkat 1. juli 2008-miilli qaammammut 3.298,00 kr.-inut 4.123 kr.-inut qaffanneqarmatali allanngortinneqarsimanngillat.

Nerisaqarnermut qaammammut 1000 kr.-iupput 2009-mili iluarsineqarsimanatik.

Kaasarfimmiut aamma atisassarsiuutit kingullermik 2000-imi qaffaavigineqarput ullumikkullu meeqqanut inuusuttunullu 16-t inorlugit ukiulinnut ullormut 36 kr.-iulluni inuusuttunullu 16-18 ukiulinnut ullormut 42 kr.-iulluni.

Nalinginnaasumik paarsinermut akissarsiat, nerisassarsiuutit, atisassarsiuutit kaasarfimmiullu ingerlaavartumik iluarsiivigineqarnissaannut suna akornutaanersoq Inatsisartunut siunnersuummik aappassaaneerinissamut nassuiaatigeqqullugu Isumaginninnermut, Ilaqutariinnermut, Naligiissitaanermut Inatsisinillu Atuutsitsinermut Naalakkersuisoq qinnuigineqarpoq?

Ataatsimiititaliaq naapertorlugu angajoqqaarsianut atugassarititaasut atugaallu malitseqartitsivigineqarnissaat pisariaqarluinnarpoq, taamaaliornikkut taakkununga

atugassarititaasut akissarsiaannullu tunngasut innuttaasunit tatigineqarlutik suliaannut ersersitsisuusinnaaqullugit. Paarsinermi aningaasarsiat aamma nerisassanut, atisassanut kaasarfimmiunullu atugassat aningaasat annertussusaat iluarsineqarnissaannut kinguaattooruteqarneq ataatsimiititaliamit akuerineqarsinnaanngilluinnarpoq. Iluarsisuteqarnissamut kinguaattooruteqarneq akiliutigineqartartup annikereertigisumut annikillisitsisoq.

Siunissami paarsinersiutit akiliutigineqartartullu allat iluarsivigineqarnissaanni akileraartarnermi malittarisassat isumaginninnermilu tunniuttakkat ataqatiginnerat eqqumaffigineqartariaqarpoq, taamaaliornikkut ataqatigiinnikkut ajornartorsiuteqarnera pissutigalugu ilaqutariit paarsisartut aningasaqarnermik pissuteqartumik meeqqanik paarsinissamut tunuarsimaaqqunagit kajumissuseeruteqqunagilluunniit.

Taamaattumik ataatsimut angajoqqaarsianut periuseqalernissaq ataatsimiititaliamit qilanaarineqarpoq.

Angajoqqaarsianut ataatsimut periuseqarneq apeqqutaatinnagu paarsinermi aningaasarsiat taakkulu annertussusaanut tunngatillugu, taamatuttaaq nerisaqarnermut, atisassarsiuutinut kaasarfimmiorisartakkat annertussusaannut innersuussutit makku saqqummiunneqarnissaat naalakkersuinikkut kissaatigineqarpoq, taamaaliornikkut AIS 2018-imut kissaatigisat taakku pingaarnersiuinermut ilanngunneqarsinnaaqullugit:

Ataatsimiititaliami ilasortaataitaasut Siumup, Inuit Ataqtigiit aamma Atassutip innersuussutigaat:

► Nalinginnaasumik paarsinersiutit 1. januar 2018-imi qaammammut 8.000 kr.-inut qaffanneqassasut.

► Akinut kaajallaasitaq Naalakkersuisunit oqaatigineqartup saniatigut qaffaanermut najoqqutassat 50 %-iupput aamma 100 %-iupput taakkulu naapertorlugit paarsinersiutit kommuninit qaffanneqarsinnaasariaqarput.

► Nerisaqarnermut akiliutit annertussusaat piaartumik naleqquttumik iluarsivigineqarnissaat pillugu siunnersuut Naalakkersuisunut isumageqquneqarpoq. Iluarsineq kingusinnerpaamik ulloq 1. juli 2018-imi atuutilernissaa naatsorsuutigineqartoq.

► Atisassarsiuutit kaasarfimmiusallu sapinngisamik piaartumik annertussusaat naleqquttumik iluarsivigineqarnissaat Naalakkersuisunut isumagisassanngortinneqarput. Iluarsineq ulloq 1. Juli 2018-imi atuutilernissaa naatsorsuutigineqarpoq.

► Iluarsiiisutissatut kissaatigineqartunut tunngatillugu qulakkeerneqassaaq akileraartarnermut aammalu isumaginninnikkut tunniuttakkanik pissarsisinnaanermut periarfissaqarnermut tunngatillugu ilaqutariit paarsisartut meeqqanik paarsinissamut aningaasaqarnikkut kajumissuseqaannartinneqarnissaat aalajangiuserneqassaaq.

Nalinginnaasumik paarsinersiutit 1. juli 2008-ili allanngortinneqarsimannginneri, tamatumani iluarsiiisoqarneq ajornerata paarsinersiutit mangiarneqarsimaneri innersuussinermit tunngavigineqarpoq. Meeqqanik paarsinissamut tatigineqarluni inuiaqatigiinni sulinissamut suli angajoqqaarsiaarusussuseqalersitsiniarnermut attassiinnarsinnaanermullu siunnersuutigineqartoq pitsanngorsaataassaaq. Tassunga ilanngunneqassaaq ataatsimut isigalugu meerarsiaasartut sumiginnagaanerata annertusiartortoq isumaqarfigineqarmat tamanna angajoqqaarsiaasartunut annertunerusumik piumasagarfiusarluni.

Immikkut pisoqartillugu immikkullu najoqqutassat atukkallu naapertorlugit paarsinersiutit qaffaavigineqarnissaannut aalajangiinissamut ullumikkut kommunit periarfissaqartariaqarput. Ullumikkut kommunit akinut najoqqutassiat 50 %-imik 100 %-imillu taamaallaat qaffaanissamut periarfissinneqartarput. Killigititaq taanna peerneqartariaqarpoq. Annertunerusumik qaffaanissaminnut kommunit periarfissinneqartariaqarput, taamaaliornikkut tassuuna angajoqqaarsiaasartut piukkunnartut meeqqanik immikkut pisariaqartitsisunik tigusinissaminnut piumasuseqarnerulersinneqarsinnaammata - Meeqqat periarfissamut allamut ulloq unnuarlu angerlarsimaffimmut inissinneqartillugit meeqqanut tapersersuineq pillugu malittarisassat naapertorlugit iliuuseqartoqartassaaq.

Nerisassarsiutit aamma atisassarsiutit kaasarfimmiussallu sukumiinerusumik naliiivigineqartariaqarput, taamaaliornikkut ullutsinnut tulluusarneqarlutik iluarsiiisoqarneq ajorsimanerata kingunerisaanik nalimmassaasoqarnissaa qulakkeerneqarsinnaaqullugu.

Paarsinersiutit tunniuttakkallu allat siunnersuummi matumani pineqartut akileraartarnikkut isumagineqarnissaannut tunngatillugu ataatsimiititaliap oqaaseqaataanut tunngaviuvoq iluarsiiisutigineqartut tamatumani peqatigisaanik akileraarutitut akiliinerusalernermik mangiarneqarnissaat ataatsimiititaliamit kissaatigineqanngimmat. Ataatsimiititaliamit aamma erseqqissaatigineqarpoq iluarsiiisuteqarnissamut atatillugu isumaginninnikkut tunniuttakkanut tunngatillugu qaffaanerup isumaginnikkut tunniuttakkanik pissarsisinnaanerup annaaneqarneranik kinguneqarnera pissutigalugu ataqatigiinnikkut ajornartorsiuteqarsinnaanera aamma eqqumaffigineqassamat, tamannami ilaqutariit paarsisartut meeqqanik paarserusussuseqarnissaannut kajumissaataanngimmat.

4. Siunnersuutip aningaasaqarnikkut kingunerisassai.

Siunnersuutip piviusunnngortinneqarnissaanut aningaasatigut kingunerisassat siunnersuuteqartup ima oqaatigigaa ataatsimiititaliamit maluginiarneqarpoq:

Paaqqutarinninnermut akissaatit assersuutigalugu qaammammut 500 kr.-inik qaffaavigigaanni 2,6 mio. Kr.-it missaani tamakkiisumik ukiumut aningasartuutaanerussaaq, kisitsit kommunit 2015-imi aningaasartuutigisimasaannit kisitsinikkut pissarsiaavoq.

Nerisaqarnermut kaasarfimmiussanut- atisarsiutissanullu aningaasartuutit qaffanneqerineri akit qaffakkiartornerinut naapertuuttunngorlugu kingullermiit inissikkaanni, ukiumut 3,1 mio. kr.-inik katillugu aningaasartuutaanerussaaq.

Matumuuna Naalackersuisut § 37 apeqqummut nr. 22/2017-imut akissutaanut innersuussivunga.

§ 37 naapertorlugu apeqquteqaammi nr. 22/2017-imut akissuteqaammi 2015-imi kommunit atuinerat aallaavigalugu paarsinersiutit 1.000 kr.-inik qaffaavigineqarnissaat 5.192.222 kr.-t missaannik ukiumut naleqassasoq ataatsimiititaliamit itisiliissutaasumik oqaatigineqassaaq.

Nerisassarsiutit, atisassarsiutit kaasarfimmiussallu akit pisisartunut akigitinneqartut kingullermik qaffanneqarmatali qaffaataasa nalinganut qanoq aningaasartuutaanerutigissanersoq § 37 naapertorlugu apeqquteqaammi ilanngullugu apeqqutigineqarpoq.

2015-imi kommunini aningaasartuutit ilisimaneqartut aallaavigalugit Naalackersuisut akissuteqarput, akigititanik qaffaaneq akit pisisartunut akigitinneqartartut qaffaataasa nalinganut qaffanneqarpata ukiumut ataatsimut 3.087.326 kr.-inik aningaasartuuteqarneruffiussaaq.

Paasissutissat ataatsimiititaliamit tusaatissatut tiguneqarput, siunnersuummili matumani qaffaatissaq ersarissumik aalajangiunneqanngimmat aningaasatigut kingunerisassai taamatutaaq ersarissumik aalajangiunneqarsinnaanngillat.

Ataatsimiititaliap inassuteqaataa

Siunnersuut ilusimisut iluseqartoq akuerineqassasoq ataatsimiititaliap inassutigaa.


Taama naatsumik oqaaseqarluni isumaliutissiisummilu oqaatigineqartutut paasinnilluni siunnersuut Ilaqutariinnermut Peqqissutsimullu ataatsimiititaliap aappassaaniigassanngortippaa.



Martha Lund Olsen,
Siulittaasoq



Mala Høy Kuko,
Siulittaasup tullia



Laura Táunâjik




Jess Svane



Mimi Karlsen



Debora Kleist



Kelly Berthelsen